

四庫全書薈要

• 乾隆御覽本

子部

唐撫言卷五

唐 王定保 撰

切磋

大居守李相讀春秋誤呼叔孫姑勅為姑勅日讀一卷

有小吏侍側常有不懌之色公恠問之爾嘗讀此書耶

曰然胡為聞我讀至此而數色沮耶吏再拜言曰緣某

師授誤呼文字今聞相公呼姑勅為姑勅方悟耳公曰

不然吾未之師也自檢釋文而讀必誤在我非在爾也

因以釋文示之

蓋書畧字以田加各首  
久而成日配畧為畧

小吏因委曲言

之公大慚媿命小吏受北面之禮號為一字師

韓文公著毛穎傳好博簞之戲張水部以書勸之凡三書其一曰比見執事多尚駁雜無實之說使人陳之於前以為歡此有累於令德又高論之際或不容人之短如任私尚勝者亦有所累也先王存六藝自有常矣有德者不為猶不為損況為博簞之戲與人競財乎君子

固不為也今執事為之以廢棄時日籍實不識其然文  
公答曰吾子譏吾與人言無實駁雜之說此吾所以為  
戲耳比之酒色不有間乎吾子譏之似同浴而譏裸體  
也若高論不能下氣或似有之當更思而悔之耳博塞  
之譏敢不承教其他俟相見

羊紹素夏課有畫狗馬難為功賦其實取畫狗馬難于  
畫鬼神之意也投表兄吳子華子華覽之謂紹素曰吾  
子此賦未嘉賦題無鬼神而賦中言鬼神子盍為畫狗

馬難於畫鬼神賦即善矣紹素未及改易子華一夕成  
於腹笥有進士韋象池州九華人始以賦卷謁子華子  
華聞之甚喜象居數日貢一篇于子華其破題曰有丹  
青二人一則矜能於狗馬一則誇妙于鬼神子華大奇  
之遂焚所著而紹素竟不能以已下之其年子華為象  
取府解

陳嶠謁安陸鄭郎中誠三年方一見誠從容謂嶠曰識  
閔廷言否嶠曰偶未知聞誠曰不妨與之還往其人文

似西漢

吳融廣明中和之際久負屈聲雖未擢科第同人多贊  
謁之如先達有王圖工詞賦投卷凡旬月融既見之殊  
不言圖之臧否但問圖曰更曾得盧休信否何堅卧不  
起惜哉融所得不如也休圖之中表長于八韻向與子  
華同硯席晚年拋廢歸鏡中別墅

李翱與陸慘書李觀之文章如此官止於太子校書年  
止于二十九雖有名於時俗其卒深知其至者果誰哉

信乎天地鬼神之無情于善人而不罰罪也甚矣為善者將安所歸乎翔書其人贈于兄贈于兄盖思君子之知我也予與觀平生不得往來及其死也則見其文嘗歎使李觀若永年則不遠于揚子雲矣書已之文次忽然若觀之文亦見於今也故書苦雨賦綴於前當下筆時復得詠其文則觀也雖不永年亦不甚遠於揚子雲矣書苦雨之辭既又思我友韓愈非茲世之文古之文也非茲世之人古之人也其詞奧其意適則孟軻既沒

亦不見有過於斯者當下筆時如他人疾書之寫誦之  
不是過也其詞乃能如此嘗書一章曰獲麟解其他亦  
可以類知也窮愁不能無述適有書寄弟正辭及其終  
亦自覺不甚下尋常之所為者亦以贈焉亦唯讀觀愈  
之詞冀一詳焉期再拜

李元賓與弟書曰年不甚幼近學何書擬應明經為復  
有文明經世傳不可墜也文貴天成強不高也二事並  
良苟事立汝擇處焉



景福中江西節度使鍾傳遣僧從約進法華經一千部  
上待之恩渥有加宣從約入內賜齋面賜紫衣一副將  
行太常博士戴司顏以詩贈行略曰遠來朝鳳闕歸去  
戀元侯時吳子華任中諫司顏仰公之名志在屬和以  
為從約之資融覽之撫掌大笑曰遮阿師更不要見便  
把拽出得其承奉如此矣

皇甫湜答李生二書第一書辱書適瞋黑使者立復不  
果一二承來意之厚傳曰言及而不言失人粗書其愚

為足下答幸察來書所謂今之工文或先於奇怪者顧其文工與否耳夫意新則異于常異于常則怪矣詞高則出于衆出衆則奇矣虎豹之文不得不炳於犬羊鸞鳳之音不得不鏘于鳥鵲金玉之光不得不炫于瓦石非有意先之也迺自然也必崔巍然後為岳必滔天然後為海明堂之棟必撓雲霓驪龍之珠必固深泉足下少年氣盛固當以出拔為意學文之初且未自盡其才何遽稱力不能哉圖王不成其弊猶可以霸其僅自見

也將不勝弊矣孔子譏其身不能者幸勉而思進之也  
來書所謂浮艷聲病之文恥不為者雖誠可恥但慮足  
下方今不爾且不能自信其言也向者足下舉進士舉  
進士者有司高張科格每歲聚者試之其所取迺足下  
所不為者也工欲善其事必先利其器足下方伐柯而  
捨其斧可乎哉恥之不當求也求而恥之惑也今吾子  
求之矣是徒涉而恥濡足也寧能自信其言哉來書所  
謂急急於立法寧人者迺在位之事聖人得勢所施為

也非詩賦之任也功既成澤既流詠歌紀述光揚之作  
作焉聖人不得勢方以文詞行於後今吾子始學未仕  
而急其事亦太蚤計矣凡來書所謂數者似言之未稱  
思之或過其餘則皆善矣既承嘉惠敢自固昧聊復所  
為俟見方盡湜再拜

皇甫湜與李生第二書湜白生之書詞甚多志氣甚橫  
流論說文章不可謂無意若僕愚且困迺生詞競于此  
固非宜雖然惡言無從不可不卒勿怪夫謂之奇則非

正矣然亦無傷于正也謂之奇即非常矣非常者謂不如常乃出常也無傷於正而出於常雖尚之亦可也此統論奇之體耳未以言文之失也夫文者非它言之華者也其用在通理而已固不務奇然亦無傷於奇也使文奇而理正是尤難也生意使其易者乎夫言亦可以通理矣而以文為貴者非他文則遠無文即不遠也以非常之文通至正之理是所以不朽也生何嫉之深耶夫繪事後素既謂之文豈苟簡而已哉聖人之文其難

及也作春秋游夏之徒不能措一詞吾何敢擬議之哉  
秦漢以來至今文學之盛莫如屈原宋玉李斯司馬遷  
相如楊雄之徒其文皆奇其傳皆遠生書文亦善矣比  
之數子似猶未勝何必心之高乎傳曰其言之不出恥  
躬之不逮也生自視何如哉書之文不奇易之文可為  
奇美豈礙理傷聖乎如龍戰於野其血玄黃見豕負塗  
載鬼一車突如其來如焚如死如棄如此何等語也生  
輕宋玉而稱仲尼班馬相如為文章案司馬遷傳屈原

曰雖與日月爭光可矣生當見之乎若相如之徒即祖  
習不暇者也豈生稱誤耶將識分有所至極耶將彼之  
所立卓爾非強為所庶幾遂讎嫉之耶其何傷於日月  
乎生笑紫貝闕兮珠宮此與詩之金玉其相何異天下  
人有金玉為之質者乎披薜荔兮帶女蘿此與贈之以  
芍藥何異文章不當如此說也豈謂怒三四而喜四三  
識出之白而信入之黑乎生云虎豹之文非奇夫長本  
非長短形之則長矣虎豹之形於犬羊故不得不奇也

他皆倣此生云自然者非性不知天下何物非自然乎  
生又云物與文學不相侔此喻也凡喻必以非類豈可  
以彈喻彈乎是不根者也生稱以知難而退為謙夫無  
難而退謙也知難而退宜也非謙也豈可見黃門而稱  
貞哉生以一詩一賦為非文章抑不知一之少便非文  
章耶直詩賦不是文章耶如詩賦非文章三百篇可燒  
矣如少非文章湯之盤銘是何物也孔子曰先行其言  
既為甲賦矣不得稱不作聲病文也孔子云必也正名



乎生既不以一第為事不當以進士冠姓名也夫煥乎  
郁郁乎之文謂制度非止文詞也前者捧卷軸而來又  
以浮艷聲病為說似商量文詞當與制度之文異日言  
也近風偷薄進士尤甚迺至有一謙三十年之說爭為  
虛張以相高自謾詩未有劉長卿一句已呼阮籍為老  
兵矣筆語未有駱賓王一字已罵宋玉為罪人矣書字  
未識偏旁高談稷契讀書未知句讀下視服鄭此時之  
大病皆當嫉者生美才勿似之也傳曰唯善人能受善

言孔子曰君子無所爭必也射乎問於湜者多矣以生之有心也聊有復不能盡不宣湜再拜

以其人不稱才試而後驚

韓文公皇甫補闕見李長吉時年七歲二公不之信因面試高軒過一篇

蔣凝咸通中詞賦絕倫隨計塗次漢南謁相國徐公公見其人么麼不信有其才因試峴山懷古一篇凝於客位賦成公大奇之

令狐文公鎮三峰時及秋賦特置五場試第一場雜文  
第二場詩歌篇第三場表檄先是盧弘正一人就試來  
者皆慄縮而退馬植以將家子弟求薦文公與從事皆  
鄙之專令人伺其詞句既而試登山採珠賦曰文豹且  
異於驪龍採斯疎矣白石又殊於老蚌剖莫得之衆皆  
大驚遂奪弘正解元矣

黎逢氣貌山野及第年初場後至便於簾前設席主司  
異之誚其生疎必謂文詞稱是專令人伺之句句來報

初聞云何人徘徊曰亦是常言既而將及數聯莫不驚歎遂擢為狀元

王勃著滕王閣序時年十四都督閻公不之信勃雖在座而閻公意屬子壻孟學士者為之已宿構矣及以紙筆延讓賓客勃不辭讓公大怒拂衣而起專令人伺其下筆第一報云南昌故郡洪都新府公曰亦是老生常談又報云星分翼軫地接衡廬公聞之沈吟不言又云落霞與孤鶩齊飛秋水共長天一色公矍然而起曰此

真天才當垂不朽矣遂亟請宴所極歡而罷

論曰書云人無常師主善為師於戲近世浮薄率皆貴  
彼生知恥乎下學質疑問禮者先懷愧色深微蹟奧者  
翻汨沈流風教頽圯莫甚於此由是李華自曰師於茂  
挺李翱亦曰請益退之于時名遂功成才高位顯務乎  
矯俗以遏崩波盛則盛矣方之繆公以小吏一言北面  
而師之者可謂曠古一人而已有若考覈詞藝之臧否  
振舉後生之行藏非唯立賢所謂報國噫今之論者信

僥倖之賊歟

唐撫言卷五

唐撫言卷六

唐 王定保 撰

公薦

門生薦坐主  
師友相薦附

崔郾侍郎既拜命於東都試舉人三署公卿皆祖於長樂傳舍冠蓋之盛罕有加也時吳武陵任太學博士策蹇而至郾聞其來微訝之乃離席與言武陵曰侍郎以峻德偉望為明天子選才俊武陵敢不薄施塵露向者



偶見太學生十數輩揚眉抵掌讀一卷文書就而觀之  
乃進士杜牧阿房宮賦若其人真王佐才也侍郎官重  
必恐未暇披覽於是搢笏朗宣一遍郾大奇之武陵曰  
請侍郎與狀頭郾曰已有人曰不得已即第五人郾未  
遑對武陵曰不爾即請還此賦郾應聲曰敬依所教既  
即席白諸公曰適吳太學以第五人見惠或曰為誰曰  
杜牧衆中有以牧不拘細行間之者郾曰已許吳君矣  
牧雖屠沽不能易也

韓文公皇甫湜貞元中名價籍甚亦一代之龍門也奇

章公始來自江黃間置書囊於國東門携所業先詣二  
公卜進退偶屬二公從容皆謁之各袖一軸面贅其首  
篇說樂韓始見題而掩卷問之曰且以拍板為什麼僧  
孺曰樂句二公因大稱賞之問所止僧孺曰某始出山  
隨計進退唯公命故未敢入國門答曰吾子之文不止  
一第當垂名耳因命於客戶坊僦一室而居俟其他適  
二公訪之因大署其門曰韓愈皇甫湜同訪幾官先輩

不過翌日自過闕而下觀者如堵咸投刺先謁之由是僧孺之名大振天下

盧延讓光化三年登第先是延讓師薛許下為詩詞意入病時人多笑之吳翰林融為侍御史出官峽中延讓時薄於荆渚貧無卷軸未遑贄謁會融表弟滕籍者偶得延讓白篇融覽大奇之曰此無他貴不尋常耳於是稱之于主成汭時故相張公職大祖於是邦常以延讓為笑並及融言之咸所改觀由是大獲舉糧延讓深

所感激然猶因循竟未相面後值融赴急徵入內庭孜  
孜於公卿間稱譽不已光化戊午歲來自襄南融一見  
如舊相識延讓嗚咽流涕於是攘臂成之矣

將仕郎守太子校書郎王泠然謹再拜上書相國燕公  
閣下孔子曰居是邦也事其大夫之賢者則僕所以有  
意上書於公為日久矣所恨公初為相而僕始總角公  
再為相僕方志學及僕預鄉舉公左官于巴丘及僕參  
常調而公統軍於沙朔今公復為相隨駕在秦僕適効

官分司在洛竟未識賈誼之面把相如之手則堯舜禹湯之正道稷契夔龍之要務焉得與相公論之乎昔者公之有文章時豈不欲文章者見之乎公未富貴時豈不欲富貴者用之乎今公貴稱當朝文稱命代見天下未富貴有文章之士不知公何以用之公一登甲科三至宰相是因文章之得用于今亦三十年後進之士公勿謂無其人何者長安令裴耀卿於開元五年掌天下舉擢僕高第以才相知今尚書右丞王丘於開元九年

掌天下選授僕清資以智見許然二君者若無明鑒寧

處要津是僕亦有文章思公見也亦未富貴思公用也  
此非自媒自衒恐不道不知有唐以來無數才子至於  
崔融李嶠宋之問沈佺期富嘉謨徐彥伯杜審言陳子  
昂者與公連飛並驅更唱迭和此數公者真可謂五百  
年後挺生矣天喪斯文凋零向盡唯相公日新厥德長  
守富貴甚善甚善是知天贊明主而福相公當此之時  
亦宜應天之休報主之寵彌縫其闕匡救其災若尸祿

備員則焉用彼相矣僕聞位稱變理者則道合陰陽四  
時不愆則百姓無怨豈有冬初不雪春盡不雨麥苗繼  
日而青死桑葉未秋而黃落蠢蠢迷愚嗷嗷愁怨而相  
公溫眠甲第飽食廟堂僕則天地之一生人亦同人而  
怨相公也京房易傳曰欲德不用茲謂張言人君欲賢  
者而不用徒張此意厥災荒云大旱也陰陽不雨復曰  
師出過時茲謂曠其旱不生夫天道遠人道邇僕多言  
者也安知天道請以人事言之主上開張翰林引納才

子公以傲物而富貴驕人為相以來竟不能進一賢拔一善漢高祖云當今之賢士豈獨異於古人乎有而不知是彰相公之暗知而不用是彰相公之短故自十月不雨至於五月雲纔積而便散雨垂落而復收此欲德不用之罰也仍聞六胡為孽日寇邊陲邦家連兵來往塞下巴西諸將必不出師過時之咎也四郊之多壘卿大夫之辱也不知廟堂肉食者何以謀之相公在外十餘年而復相國險阻艱難備嘗之矣民之情偽盡知之



矣今人室如懸罄野無青草何恃而不恐天則不雨公將若之何昨五月有恩百官受賜相公官既大物亦多有金銀器及錦衣等聞公受之面有喜色今歲大旱黎民阻饑公何不固辭金銀請賑倉廩懷寶衣錦於相公安乎百姓餓欲死公何不舉賢自代讓位請歸公三為相而天下之人皆以公為亢極矣夫物極則反人盛必衰日中則昃月滿則虧老子曰功成名遂身退天之道也今公富貴功成文章名遂唯身未退耳相公昔在南

中自為岳陽集有送別詩云誰念三千里江潭一老翁

則知虞卿非窮愁不能著書以自見賈誼非流竄不能  
作賦以自安公當此時思欲生入京華老歸田里脫身  
瘴癘其可得乎今則不然忘往日之栖遲貪暮年之富  
貴僕恐前途更失後悔難追主上以相公為賢使輔佐  
社稷若棄德不讓是廢明君之舉豈曰能賢僕見相公  
事方急不可默諸桃李公聞人之言或中猶可收以桑  
榆詩曰投我以木瓜報之以瓊琚此言雖小可以喻大

相公五君詠曰淒涼丞相府餘慶在玄成蘇公一聞此  
詩移相公于荆府積漸至相由蘇得也今蘇屈居益部  
公坐廟堂投木報瓊義將安在亦可舉蘇以自代然後  
為方朔之行抑又聞屋漏在上知之在下報國之重莫  
若進賢去年赦書云草澤卑位之間恐遺賢俊宜令兵  
部即作牒目徵召奏聞而吏部起請云試日等第全下  
者舉主量加貶削條目一行僕知天下父不舉子兄不  
舉弟向者百司諸州長官皆無才能之輩並全軀保妻

子之徒一入朝廷則恐出暫居州郡即思改宣有輕為  
進舉以取貶削今聞天下向有四百人應舉相公豈與  
四百人盡及第乎既有等差由此百司諸州長官懼貶  
削而不舉者多矣僕竊謂今之得舉者不以親則以勢  
不以賄則以交未必能鳴鼓四科而裹糧三道其不得  
舉者無媒無黨有行有才處卑位之間仄陋之下吞聲  
飲氣何足算哉何乃天子今有司舉之而相公令有司  
拒之則所謂欲德不用徒張此意事與京房易傳同故

天以大旱相試也去年所舉縣令吏部一例與官舉若  
得人天何不雨賢俊之舉楚既失之縣令之舉齊亦未  
得夫有賢明宰相尚不能變理陰陽而今庸才宰相君豈  
即能緝熙風化相公必欲選良宰莫若舉前倉部員外  
郎吳太玄為洛陽令必欲舉御史中丞莫若舉襄州刺  
史靳蘄清輦轂之路非太玄不可生臺閣之風非靳不  
可僕非吳靳親友但以知其賢明相公有而不知知而  
不用亦其過深矣抑又聞之昔閔子騫為政曰仍舊貫

如之何何必改作凡校書正字一概不得入畿相公曾  
為此職見貞觀已來故事今吏部侍郎楊滔眼不識字  
心不好賢蕪穢我清司改張我舊貫去年冬奏請自今  
已後官無內外一例不得入畿即知正字校書不如一  
鄉縣尉明經進士不如三衛出身相公復此改張甄別  
安在古人有坐釣登相立籌封侯今僕無尚父之謀薛  
公之策徒以仕於書苑生於學門小道逢時大言祈相  
僕也幸甚幸甚去冬有詩贈公愛子協律其詩有句云

官微思倚王文淺怯投珠呂氏春秋云嘗一臠之肉知  
一鼎之味請公且看此十字則知僕曾吟五言則亦更  
有舊文願呈作者如公之用人蓋已多矣僕之思用其  
來久矣拾遺補闕寧有種乎僕雖不佞亦相公一株桃  
李也此書上論不雨陰陽垂度中願相公進賢為務下  
論僕身求用之路事繁而言不典理切而語多忤其善  
也必為執事所哂其惡也必為執事所怒倘哂既罷怒  
方解則僕當持舊文章而再拜來也

韓偓天復初入翰林其年久車駕出幸鳳翔偓有扈從之功返正初上面許偓為相奏云陛下運契中興當復用重德鎮風俗臣座主右僕射趙崇可以副陛下是選乞迴臣之命授崇天下幸甚上嘉嘆翌日制用崇暨兵部侍郎王贊為相時梁太祖在京素聞崇之輕佻贊復有嫌釁馳入請見于上前具言二公長短上曰趙崇是偓薦時偓在側梁主叱之偓奏云臣不敢與大臣爭上曰韓偓出尋謫官入閩故偓有詩曰手風慵展八行書



眼暗休看九局圖窓裏日光飛野馬案前筠管長蒲盧  
謀身拙為安蛇足報國危曾捋虎鬚舉世可能無默識  
未知誰復試齊竽

崔顥薦樊衡書夫相州者九王之舊都西山雄崇足是  
秀異竊見縣人樊衡年三十神爽清悟才能絕倫雖白  
面書生有雄膽大畧深識可以軌時俗長策可以安塞  
裔藏用守道實有歲年今國家封山勒崇希代罕遇含  
育之類莫不踴躍況詔徵隱逸州貢茂異衡之際會千

載一時君侯復躬自執圭陪鑒日觀此州名藩必有所  
舉當是舉者非衡而誰伏願不棄賢才賜以甄獎得奔  
大禮升聞天朝衡因此時策名樹績報國榮家今當  
之士知出君侯之門矣顯不勝區區敢聞左右俯伏階  
屏用增戰汗

顯薦齊秀才書其言至辱垂下問今公舉一人可管記  
之任者愚以為軍中之書記卽度使之喉舌指事立言  
而上達思中天心發號出令下行胡悅人意諒非容

易而可專據竊見前進士高陽齊孝若考中二十四  
學必專授文皆雅正詞賦甚精章表殊健疏眉目美風  
姿外若坦蕩中實畏慎執事倘引在幕下列於賓佐使  
其馳一檄飛書必能應馬上之急求言腹中之所欲夫  
掇芳刈楚不棄幽遠況孝若相門子弟射策甲科家居  
君侯之宇下且數年矣不勞重幣而獲至寶甚善甚善  
雄都大府多士如林最所知者斯人也請為閣下記其  
若此唯用與捨高明裁之謹再拜

李翱薦所知於徐州張僕射書翱載拜齊桓公不疑於  
其臣管夷吾信而伯天下攘戎狄匡周室亡國存荆楚  
一 伏無不為二 豎刁易牙信而齊國亂身死不及葬

五公子爭立兄弟相反者數世桓公信於其臣一道  
也所信者得其人則格於天地功及後世不得其人則  
不能免其死知人不易也豈唯霸者為然雖聖人亦不  
免焉帝堯之時賢不肖皆立於朝堯能知舜於是乎放  
驩兜流共工殛鯀竄三苗舉禹稷臯陶二十有二人加

諸上位故堯崩三載四海之內遏密八音後世之人皆謂之帝堯焉向使堯不能知舜而遂尊驩兜共工之徒於朝禹稷臯陶之下二十有二人不能用則堯將不能得無為爾豈復得曰大哉堯之為君也唯天為大唯堯則之蕩蕩乎民無能名焉者哉春秋曰夏滅項孰滅之蓋齊滅之曷為不言齊滅之為桓公諱也春秋為賢者諱此滅人之國何賢爾君子之惡惡也疾始善善也樂終桓公嘗有繼絕存亡之功故君子為之諱也繼絕存

亡賢者之事管夷吾用所以能繼絕存亡用賢焉耳豎

刁易牙用則不能也向使桓公始不用管夷吾未有豎  
刁易牙爭權不葬而亂齊國則幽厲之諸侯也始用賢  
而終身諱其惡君子之樂用賢也如此始不用賢以及  
其終而幸後世之掩其過也則微矣然則居上位流德  
澤於百姓者何所勞乎勞于擇賢得其人措諸上使天  
下皆化之焉而已矣茲天子之大臣有土千里者孰有  
如閭下之好賢不倦者乎蓋得其人亦多矣其所求而

得而不取者則有人焉隴西李觀奇士也伏聞閣下知其賢將用之未及而觀疾死昌黎韓愈得古人之遺風明于理亂根本之所由伏聞閣下復知其賢將用之未及而愈為宣武軍節度使之所用觀愈皆豪傑之士也如此人不時出觀自古天下亦有數百年無如其人者焉聞閣下皆得而知之皆不得而用之翱實為閣下惜焉豈為翱一人而已後之讀前載者亦必多為閣下惜之矣茲有平昌孟郊賢士也伏聞閣下舊知之郊為五

言詩自前漢李都尉蘓屬國及建安諸子南朝二謝郊  
能兼其體而有之李觀薦郊于梁肅補闕書曰郊之五  
言其有高處在無上其有平處下顧兩謝韓愈送郊詩  
曰作詩三百首杳默咸池音彼二子皆知言者豈欺天  
下之人哉郊窮餓不得安養其親周天下無所遇作詩  
曰食蘼腸亦苦強歌聲無歡出門即有礙誰謂天地寬  
其窮也甚矣復有張籍李景儉者皆奇才也未聞閣下  
知之凡賢士奇人皆有所負不苟合于世是以雖見之



難得而知也見而不能知如勿見而已矣知其賢而不能  
用如勿知其賢而已矣用而不能盡其才如勿用而  
已矣能盡其才而容讒人之所間者如勿盡其才而已  
矣故見賢而能知知而能用用而能盡其才而不容讒  
人之所間者天下一人而已矣茲有二人焉偕來其一  
賢士也其一常常之人也待之禮貌不加隆焉則賢者  
往而常常之人日來矣況其待常常人加厚則善人何  
求而來哉孔子曰吾未見好德如好色者也賢者不好

色而好德者也雖好色而不如好德者次也色與德均  
好者復其次也雖好德而不如好色者下也最甚不好  
德而好色者窮矣人有告曰某所有女國色也天下之  
人必竭其財求之而無愛矣有人告某所有人國士也  
天下之人則不能一往而見焉是豈非不好德而好色  
者乎賢者則宜有別於天下之人矣孔子述易定禮樂  
刪詩書作春秋聖人也奮乎萬世之上其所化之者非  
其道則夷狄人也而孔子之廟存焉雖賢者亦不能日

往而拜之以其益於人者寡矣故無益於人雖孔聖之廟猶不能朝夕而事焉有待於人而不能禮善人良士則不如無待也嗚呼人之降年不可與期郊將為他人所得而大有立於世與短命而死皆不可知也二者卒然有一於郊之體其為惜之不可既矣閣下終不得而用之矣雖恨之亦無可奈何矣翱窮賤人也直辭無讓非所宜至于此者也為道之存焉耳不直則不足以伸道也非好多言者也翱載拜

贊曰舉孤棄讎聖人所美下展蔽善匹夫所鄙懿彼數  
公時行時止守道克勤薦賢不倚冷然所尚鴻儒不為  
矣

唐撫言卷六

唐撫言卷七

唐 王定保 撰

起自寒苦

不第即  
貴附

武德五年李義琛與弟義琰從弟上德三人同舉進士  
義琛等隴西人世居鄴城國初草創未定家素貧乏與  
上德同居事從姑定省如親焉隨計至潼關遇大雪逆  
旅不容有咸陽商人見而憐之延與同寢處居數日雪

霽而去琛等議鬻驢以一醉酬之商人竊知不辭而去  
義琛後宰咸陽召商人與之抗禮義琛位至刑部侍郎  
雍州長史義琰相高宗皇帝上德司門郎中

王播少孤貧嘗客揚州惠昭寺木蘭院隨僧齋食諸僧  
厭怠播至已飯矣後二紀播自重位出鎮是邦因訪舊  
遊向之題已皆碧紗幕其上播繼以二絕句曰二十年  
前此院遊木蘭花發院新修而今再到經行處樹老無  
花僧白頭上堂已了各西東慙愧闍黎飯後鐘二十年

來塵撲面如今始得碧紗籠

鄭朗相公初舉遇一僧善氣色謂公曰郎君貴極人臣然無進士及第之分若及第即一生厄塞既而狀元及第賀客盈門唯此僧不至及重試退黜言者甚衆而此僧獨賀曰富貴在裏既而竟如其所卜

李絳趙郡贊皇人曾祖貞簡祖岡官終襄帥絳為名相絳子璋宣州觀察楊相公造白檀香亭子初成會親賓落之先是璋潛遣人度其廣狹織一地毯其日獻之及



宋七  
收敗璋從坐璋子德璘名過其實入梁終夕拜

徐商相公嘗於中條山萬固寺泉入院讀書家廟碑云  
隨僧洗鉢

韋令公昭度少貧窶常依左街僧錄淨光大師隨僧齋  
粥淨光有人倫之鑒常器重之

好放孤寒

元和十一年歲在丙申李涼公下三十三人皆取寒素  
時有詩曰元和天子丙申年三十三人同得仙袍似爛

銀文似錦相將白日上青天

李太尉德裕頗為寒進開路及謫官南去或有詩曰八  
百孤寒齊下淚一時南望李崖州

昭宗皇帝頗為寒進開路崔合州榜放但是子弟無問  
文章厚薄隣之金瓦其間屈人不少孤寒中唯程晏黃  
滔擅場之外其餘以程試考之濫得亦不少矣然如王  
貞白張蠙之詩趙觀文古風之作皆臻前輩之閭闕者  
也

升沈後進

太和中蘓景胤張元夫為翰林主人楊汝士與弟虞卿及漢公尤為文林表式故後進相謂曰欲入舉場先問蘓張蘇張猶可三楊殺我

大中咸通中盛傳崔慎由相公嘗寓尺題于知聞或曰王凝裴瓚舍弟安潛朝中無呼字知聞廳裏絕脫靴賓客凝終宣城瓚禮部尚書潛侍中

太平王崇實賢二家率以科目為資足以升沈後進故

科目舉人相謂曰未見王賓徒勞漫走

奇章公始舉進士致琴書於灞漣間先以所業謁韓文  
公皇甫員外時首造退之退之他適第留卷而已無何  
退之訪湜遇奇章亦及門二賢見刺欣然同契延接詢  
及所止對曰某方以薄技卜妍醜於宗匠進退唯命一  
囊猶寘於國門之外二公披卷卷首有說樂一章未閱  
其詞遽曰斯高文且以拍板為什麼對曰謂之樂句二  
公相顧大喜曰斯高文必矣公因謀所居二公沈吟良

久曰可於客戶坊稅一廟院公如所教造門致謝二公  
復誨之曰某日可遊青龍寺薄暮而歸二公其日聯鑣  
至彼因大署其門曰韓愈皇甫湜同訪幾官先輩不遇  
翌日輦轂名士咸往觀焉奇章之名由是赫然矣  
論曰馬不必騏驎要之善走浴不必江海要之去垢苟  
華而不實以比周鼓譽者不為君子腹誹鮮矣

知己

張燕公知房太尉獨孤常州知梁補闕二君子之美出

於李翱上揚中丞書云竊以朝廷之士文行光明可以  
為後進所依歸者不過十人翱亦常伏其門下舉其五  
人則無誘勸之心雖有卓犖竒怪之賢固不可得而知  
也其餘或雖知欲為薦言于人復懼人不我信因人之  
所不信復生疑而不信自信猶且不固矧曰能人之固  
是以再往見之或不如其初三往復不如其再若張燕  
公之于房太尉獨孤常州之于梁補闕萬不見一人焉  
李翱感知已賦序曰貞元九年翱始就州序之貢與人

事其九月執文章一通謁右補闕梁君當此時梁君譽塞天下屬詞求進士奉文章走梁君門下者蓋無虛日梁君知人之故也亦既相見遂與翱有相知之道焉謂翱得古人之遺風期翱之名不朽於無窮許翱以拂拭吹噓翱初謂其面相進也亦未幸甚十一月梁君遘疾歿翱漸遊於朋友公卿間往往皆曰吾既籍子姓名于補闕梁君也翱乃知其非面進也當時意謂先進者遇人特達皆合有此心亦未謂知己之難得也梁君歿于

茲五年翔學聖人經籍教訓文句之為文將數萬言愈  
昔年見梁君之文弗啻數倍雖不敢同德于古人然亦  
幸無忤于中心每歲試于禮部連以文章罷黜名聲晦  
昧於時俗人皆謂之固宜然後知先進者遇人特達亦  
不皆有此心乃知知己之難得也夫見善而不能知雖  
善何為知而不能譽則如弗知譽而不能深則如弗譽  
深而不能久則如弗深久而不能終則如弗久翺雖不  
肖幸辱梁君所知君為之言於人豈非譽歟謂其得古



人遺風豈非深歟而逮及終身豈非久歟不幸梁君短命遽歿是以翺未能有成也其誰將繼梁君之志而成之歟已焉哉天之遽喪梁君也是使予之命久屯遭阨窮也遂賦知已以自傷其言怨而不亂蓋小雅騷人之餘風也。

李元賓曰觀有倍年之友朱巨源

李華撰三賢論

劉春虛  
元德秀

蕭頌士

或曰吾讀古人之書

而求古人之賢未獲邈叔謂曰無世無賢人其或世教

不至淪於風波雖賢不能自辨況察者未之究乎鄭衛  
方奏正聲間發極和無味至文無采聽者不違反以為  
怪譎之音太師樂工亦失容而止曼都之姿雜於憔悴  
被縕絮蒙蕭艾美醜夷倫自以為陋此二者既病不自  
明復求者亦昏將割其善惡在遷政化俗則賢不肖異  
貫而後賢者自明而察者不惑也予兄事元魯山而友  
劉蕭二功曹此三賢者可謂之達矣或曰願聞三子之  
略遐叔曰元之志行當以道統天下劉之志行當以六

經諧人心蕭之志行當以中古易今世元齊愚智劉戚  
一物不得其正蕭呼吸折節而獲重祿不易一刻之安  
元之道劉之深蕭之志及于夫子之門則達者其流也  
然各有病元病酒劉病賞物蕭病貶惡太亟獎能太重  
元奉親孝居喪哀撫孤仁徇朋友之急涖職明於賞罰  
終身貧而樂天知命以為王者作樂崇德殷薦上帝以  
配祖考天人之極致也而詞章不稱是無樂也於是作  
破陣樂詞協商周之頌推是而論則見元之道矣劉名

儒史官之家兄弟以學著稱乃述詩書禮易春秋為古文五說條貫源流備古今之變推是而論則見劉之深矣蕭以詩書為煩尤罪子長不編年乃為列傳後代因之非典訓也將正其失自春秋三家之後非訓齊生人不錄次序續修以迄於今未就而歿推是而論則見蕭之志矣元據師保之席瞻形容不俟見而見其人劉備卿佐之服居賓友之地言理亂根源人倫隱明參乎元精而後見其妙蕭若百鍊之鋼不可屈抑當廢興去就

之際一生一死之間而後見其大節視聽過速欲人人  
如我志與時多背常見詬於人取其中節之舉是可以  
為人師矣學廣而不偏精其貫穿甚於精者文方復雅  
尚之至常以律度百代為任古之能者往往不至焉超  
絕蹈厲不可為不知者言也茂挺父為莒丞得罪清河  
張惟一時佐廉使按成之茂挺初登科自洛還莒道邀  
使車發辭哀乞惟一涕下即日捨之且曰蕭贊府生一  
賢方資天下風教吾由是得罪無憾也夫如是得不謂

之孝乎或曰三子者各有所與遊乎遐叔曰若太尉房公可謂名卿矣每見魯山即終日歎息謂余曰見紫芝眉宇使人名利之心盡矣若司業蘓公可謂賢人矣每謂當時名士曰僕不幸生于衰俗所不恥者識元紫芝廣平程休士美端重寡言河間邢宇深明操持不局宇弟宙次宗和而不流南陽張茂之季豐守道而能斷趙郡李萼伯高含大雅之素萼族子丹叔南誠莊而文丹族子惟岳謀道沈遠廉靜梁國喬澤德源昂昂有古風

弘農楊拯士扶敏而安道清河房垂翼明志而好古河  
東柳識方明遐曠而才是皆慕於元者也劉在京下嘗  
寢疾房公時臨扶風聞之通夕不寐顧謂賓從曰即若  
不起無復有神道尚書劉公每有勝理必詣與談終日  
忘返退而嘆曰聞劉公清言見皇王之理矣殷直清有  
識尚恨言理少對未與劉面常想見其人河東裴騰士  
舉朗邁真直弟霸士會峻清不雜隴西李廙敬叔堅明  
沖粹范陽盧虛舟幼真質方而清潁川陳謏言士然淡

而不厭渤海吳興宗秀長專靜不渝潁川陳兼不器  
行古人之道渤海高適達夫落落有奇節是皆重劉者  
也工部侍郎韋述修國史推蕭同事禮部侍郎楊俊掌  
貢舉問蕭求人海內以為德選汝南邵軫緯卿有詞學  
標幹天水趙驊雲卿才美行純陳郡殷寅直清達於名  
理河南源衍季融粹而復微曾稽孔至惟微述而好古  
河南陸據德隣恢恢善于事理河東柳芳仲敷該博故  
事長樂賈至幼隣名重當時京兆韋收仲成遠慮而深



南陽張友略維之履道體仁友略族弟邈季遐溫其如  
王中山劉頴士端疎明簡暢頴川韓拯佐元行修而文  
樂安孫益盈孺溫良忠厚京兆韋建士經中明外純頴  
川陳晉正卿深于詩書天水尹微之誠貫百家之言是  
皆厚于蕭者也尚書顏公重名節敦故舊於茂挺少相  
知茂挺與趙驊邵軫洎華最善天下謂之蕭李之交殷  
寅源衍睦於二交之間不幸元罷魯山終於陸渾劉避  
地逝於安康蕭歸葬先人歿于汝南今復求斯人有之

無之是必有之而察之未克也三賢不登尊位不享下  
壽居易委順賢人之達也不蒙其教生人之病余知三  
賢也深故言之不忤云一云李華復友權皋張友略

出皋

墓銘也

顏真卿與陸據柳芳善

杜紫微覽趙渭南卷蚤秋詩云殘星幾點雁橫塞長笛  
一聲人倚樓吟味不已因目叟為趙倚樓復有贈叟詩  
曰今代風騷將誰登李杜壇灞陵鯨海動翰苑鶴天寒

今日訪君還有意三條冰雪借予看紫微更寄張祐畧  
曰睫在眼前長不見道非身外更何求誰人得似張公  
子十首詩輕萬戶侯

貞元中李元賓韓愈李絳崔羣同年進士先是四君子  
交久矣共遊梁補闕之門居三歲肅未之面而四賢  
造肅多矣靡不偕行肅異之一日延接觀等俱以文學  
為肅所稱復獎以交遊之道然肅素有人倫之鑒觀愈  
等既去復止絳羣曰公等文行相契他日皆振大名然

二君子位極人臣勉旃勉旃後二賢果如所卜

李華著含元殿賦蕭穎士見之曰景福之上靈光之下  
白樂天初舉名未振以詩詩謁顧況況謔之曰長安百  
物貴居大不易及讀至賦得原上草送友人詩曰野火  
燒不盡春風吹又生況嘆之曰有句如此居天下有甚  
難老夫前言戲之耳

李太白始自蜀至京名未甚振因以所業詩謁賀知章  
知章覽蜀道難一篇揚眉謂之曰公非人世之人可不

是太白星精耶


蔣凝江東人工於八韻然其形不稱名隨計途次襄陽  
謁徐相商公疑其假手因試峴山懷古一篇凝於客次  
賦成尤得意時溫飛卿居幕下大加稱譽

論曰夫求知者匪言不通既通者匪節不合得之於內  
失之於外萬萬不能移也所以越石父免於羈東未旋  
踵而責以非禮善窺其合而已矣其有屬詞叙事言雖  
訐闕知之者不其咎歟苟異於是其如險詖何





唐撫言卷七



總校官庶吉士 臣侍 朝

校對官庶吉士 臣戴心亨

謄錄監生 臣徐繩玉



欽定四庫全書薈要

子部

唐撫言卷八至  
十一



詳校官兵部主事臣雷純

唐撫言卷八

唐 王定保 撰

通榜



十八年權德輿主文陸修員外通榜帖韓文公薦  
十人於修其上四人曰侯喜侯雲長劉述古韋紆其次  
六人沈杞張荻尉遲汾李紳張後餘李翊而權公凡三  
榜共放六人而荻紳後餘不出五年內皆捷矣

陸忠州榜時梁補闕肅王郎中傑佐之肅薦八人俱捷  
餘皆共成之故忠州之得人皆烜赫事見韓文公與陸  
參員外書

三榜裴公第一榜拾遺盧參預之第二第三榜諫議柳  
遜起居舍人于兢佐之錢紫微珣亦頗通矣

鄭顥都尉第一榜託崔雍員外為榜雍甚然諾顥從之  
雍第推延至榜除日顥待榜不至隕穫且至會雍遣小  
僮壽兒者傳云來蚤陳賀顥問有何文字壽兒曰無然

日勢既暮壽兒且寄院中止宿顗亦懷疑因命搜壽兒懷袖一無所得顗不得已遂躬自操觚夜艾壽兒以一蠟彈丸進顗即榜也顗得之大喜狼忙札之一無更易

主司撓悶

貞元十一年呂渭第一榜撓悶不能定去留因以詩寄前主司曰獨坐貢闈裏愁多芳草生仙翁昨日事應見此時情

陰注陽受



楊嗣復第二榜盧求者李翱之壻先是翱典合肥郡有  
一道人詣翱自言能使鬼神翱謂其妖叱去既而謂翱  
曰使君胡不惜骨肉翱愈怒命繫於非所其夕內子心  
痛將絕頗為兒女所尤亟命召至謝焉道人唯唯而已  
翱待之以酒其人能劇飲數斗不能亂翱心敬憚以孺  
人之危為乞因請為翱奏章其妻尋愈翱叩頭致謝復  
謂翱曰所寫章不謹某向甚懼謫罰翱對以自札固無  
錯悞其人微笑即深懷中得向所焚章果注一字翱益

神之後翱任楚州

或曰桂州

其人復至其年楊嗣復知舉求

落第嗣復翱之親表由是頗以求為嫌因訪於道人道  
人言曰此細事亦可為奏章一通凡硯紙筆復置醇酎  
數斗於側其人以巨杯引滿而飲寢少頃而覺覺而復  
飲暨蠱恥即整衣冠北望而拜遽對案手疏二緘遲明  
授翱曰今秋有主司且開小卷明年見榜開大卷翱如  
所教尋遞中報至嗣復依前主文即開小卷詞云非頭  
黃尾三求六李翱奇之遂寄嗣復嗣復已有所貯頗疑

漏泄及放榜開大卷乃一榜煥然不差一字其年裴休  
為狀元黃價居榜末次則盧求耳餘皆契合後翱鎮襄  
陽其人復至翱虔敬可知也謂翱曰鄙人載來蓋仰公  
之政也因命出諸子熟視皆曰不繼翱無所得遂遣諸  
女出拜之乃曰尚書他日外孫三人皆位至宰輔後求  
子携鄭亞子畋杜審權子讓能為將相

夢

鍾輻虔州南康人也始建山齋為習業之所因手植一

松於庭際俄夢朱衣吏白云松圍三尺子當及第輻惡之爾來三十餘年輻方策名使人驗之松圍果三尺矣沈光始貢于有司嘗夢一海船自夢後咸敗於垂成暨登第年亦如是皆謂失之之夢而特地不測無何謝恩之際升階忽爾迴颺吹一海圖拂光之面正當一巨舶即夢中所覩之物

孫龍光偓崔澹下狀元及第前一年嘗夢積木數百偓踐履往復既而請一李處士圓之處士曰賀喜郎君來



年必是狀元何者已居衆材之上也

予次匡廬其夕遥祝九天使者俄夢朱衣道人長丈餘  
特以青灰落衣襟霏霏然常自謂魚透龍門凡三經復  
透矣私心常慮舉事中輟既三舉矣欲罷不能於是四  
舉有司遂倖忝矣

聽響卜

畢誠相公及第年與一二同人聽響卜夜艾人稀久無  
所聞俄遇人投骨於地羣犬爭趨又一人曰後來者必銜

得

韋甄及第年事勢固萬全矣然未知名第高下志在鼎  
甲未免撓懷俄聽於光德里南街忽覩一人叩一版門  
甚急良久軋然門開呼曰十三官尊體萬福既而甄果  
是第十三人矣

自放狀頭

杜黃門第一榜尹樞為狀頭先是杜公主文志在公選  
知與無預評品者第三場庭叅之際公謂諸生曰主上

誤聽薄劣俾為社稷求棟梁諸學士皆一時英雋奈無人相救時入策五百餘人相顧而已樞年七十餘獨趨進曰未諭侍郎尊旨公曰未有榜帖對曰樞不才公欣然延之從容因命卷簾授以紙筆樞援毫斯須而就每札一人則抗聲斥其姓名自始至末列庭間之咨嗟嘆其公道者一口然後長跪授之唯空其元而已公覽讀致謝訖乃以狀元為請樞曰狀元非老夫不可公大奇之因命筆親自札之

鄭損舍人先啟中隨駕在興元丞相陸公扆為狀元先是扆與損同止逆旅扆于時出丞相文忠公之門切於了却身事時已六月懇叩公希奏置舉場公曰奈時深夏復使何人主司扆曰鄭舍人其人也公然之因請扆致謝于損扆乃躬詣損拜請其榜帖皆扆自定

遭遇

貞元二年牛錫庶謝登蕭少保下及第先是昕寶應二年一榜之後爾來二紀矣國之耆老殆非俊造馳騁之

所二子久屈場籍其年計偕來主文頗以耕鑿為急無  
何並馳人事因迴避朝客誤入昕第昕岸幘倚杖謂二  
子來謁命左右延接二子初未知誰也潛訪於閤吏吏  
曰蕭尚書也因各以常行一軸面贄大蒙稱賞昕以久  
無後進及門見之甚喜因留連竟日俄有一僕附耳昕  
盼二子覲然既而上列繼至二子隱於屏後或曰二十  
四年載主文柄國朝盛事所未曾有二子間之亦不意  
是昕猶慮數刻淹留失之善地朝士既去二子辭昕面

告之復許以高第竟如所諾

友放

王相起長慶中再主文柄志欲以白敏中為狀元病其  
人與賀拔甚為交友甚有文而落拓因密令親知申意  
俾敏中與甚絕前人復約敏中為具以待之敏中欣然  
曰皆如所教既而甚果造門左右給以敏中他適甚遲  
留不言而去俄頃敏中躍出連呼左右召甚於是悉以  
實告乃曰一第何門不可致奈輕負至交相與歡醉負

陽而寢前人覩之大怒而去懇告於起且云不可必矣  
起曰我比只得白敏中今當更取賀拔甚矣

誤放

包誼者江東人也有文詞初與計偕到京師後時起試  
不及宗人祭酒佶憐之館於私第誼多遊佛寺無何唐  
突中書舍人劉太真覩其色目舉人也命一介致問誼  
勃然曰進士包誼素不相識何勞要問太真甚銜之以  
至專訪其人於佶佶聞誼所為大怒而忌之因詰責遣

從他舍誼亦無忤色明年太真主文志在致其永弃故  
落雜文俟終場明遣之既而自悔之曰此子既忤我從  
而報之是淺為丈夫也必矣但能永廢其人何必在此  
於是放入策太真將放榜先巡宅呈宰相榜中有姓朱  
人及第宰相以朱泚近大逆未欲以此姓及第亟遣易  
之太真錯愕趨出不記他人唯記誼爾及誼謝恩方悟  
已所惡也因明言乃知得喪非人力也盖假手而已

鄭侍郎薰主文誤謂顏標乃魯公之後時徐方未寧志



在激勸忠烈即以標為狀元謝恩日從容問及廟院標  
曰標寒進也未嘗有廟院薰始大悟塞默而已尋為無  
名子所嘲曰主司頭腦太冬烘錯認顏標作魯公

憂中有喜

公乘億魏人也以詞賦著名咸通十三年垂三十舉矣  
嘗大病鄉人誤傳已死其妻自河北來迎喪會億送客  
至坡下遇其妻始夫妻濶別積十餘歲億時在馬上見  
一婦人麓縵跨驢依稀與妻類因睨之不已妻亦如是

乃令人詰之果億也億與之相持而泣路人皆異之後旬日登第矣

為鄉人輕視而得者

許崇宣州涇縣人蚤修舉業鄉人汪遵者幼為小吏洎崇應二十餘舉遵猶在胥徒然善為絕句詩而深自晦密一旦辭役就貢會崇送客至灞滻間忽遇遵於途中崇訊之曰汪都都者吏之呼也何事至京遵對曰此來就貢崇怒曰小吏無禮而與崇同硯席崇甚侮之後遵成名五

年棠始及第

以賢妻激勸而得者

彭伉湛賁俱袁州宜春人伉妻即湛姨也伉舉進士擢第湛猶為縣吏妻族為置賀宴皆官人名士伉居客之右一座盡傾湛至命飯於後閣湛無難色其妻忿然責之曰男子不能自勵窘辱如此復何為容湛感其言孜孜學業未數載一舉登第伉嘗侮之時伉方跨長耳縱遊於郊忽有僮馳報湛郎及第伉失聲而墜故袁人謔

曰湛郎及第彭伉落驢

已落重收

顧非熊况之子滑稽好辯凌轢氣焰子弟為衆所怒非  
熊既為所排在舉場三十年屈聲聒人耳長慶中陳商  
放榜上怪無非熊名詔有司追榜放及第時天下寒進  
皆知勸矣詩人劉得仁賀詩曰愚為童穉時已解念君  
詩及得高科晚須逢聖主知

元和九年韋貫之榜殷堯藩雜文落矣楊漢公尚書乃

貫之前榜門生盛言堯藩之屈貫之為之重收或曰李  
景讓以太夫人有疾報堂請暫省侍路逢楊虞卿懇稱  
班圖源之屈因而得之也

貞元中李繆公先榜落矣先是出試楊員外於陵省宿  
歸第遇程於省司詢之所試程探勒中得賦藁示之其  
破題曰德動天鑒祥開日華於陵覽之謂程曰公今年  
須作狀元翌日雜文無名於陵深不平乃於故策子末  
繕寫而斥其名氏携之以詣主文從容給之曰侍郎今

者所試賦奈何用舊題主文辭以非也於陵曰不止題  
目向有人賦次韵脚亦同主文大驚於陵乃出程賦示  
之主文嘆賞不已於陵曰當今場中若有此賦侍郎何  
以待之主文曰無則已有則非狀元不可也於陵曰苟  
如此侍郎已遺賢矣乃李程所作亟命取程所納面對  
不差一字主文因而致謝於陵於是請擢為狀元前榜  
不復收矣或曰出榜重收

放老

天復元年杜德祥榜放曹松王希羽劉象柯崇鄭希顏等及第時上新平內難間放新進士喜甚詔選中有孤平屈人宜令以名間特勅授官故德祥以松等塞詔各受正制畧曰念爾登科之際當予反正之年宜降異恩各膺寵命松舒州人也學賈司倉為詩此外無他能時號松啟事為送羊脚狀希羽歙州人也詞藝優博松希羽甲子皆七十餘象京兆人崇希顏閩中人皆以詩卷及第亦皆年逾耳順矣時謂五老榜

及第與長行拜官相次

楊敬之拜國子司業次子戴進士及第長子三史登科  
時號楊三喜

崔昭矩大順中裴公下狀元及第翌日兄昭緯登庸王  
侔丞相魯公損之子侔及第翌日損登庸王侔過堂別  
見

歸黯親迎拜席日狀元及第榜下版巡脫白朞月無疾  
而卒



別頭及第

別頭及第始於上元二年錢令緒鄭人政王悌崔志恂等四人亦謂之承優及第

楊嚴等會昌四年王起奏五人楊知至

刑部尚書汝士之子

源重

故相牛僧孺之甥

鄭朴

河東節度使崔元式女壻

楊嚴

監察御史發之弟

竇緘

故相易直

之恩旨令送所試雜文付翰林重考覆續奉進旨楊嚴

一人宜與及第源重四人落下時楊知至因以長句呈

同年曰由來梁鷺與冥鴻不合翩翩向碧空寒谷謾勞

鄒氏律長天獨遇宋都風此時泣玉情雖異他日銜環  
事亦同三月春光正搖蕩無因得醉杏園中

及第後隱居

費冠卿元和二年及第以祿不及親永懷罔極之念遂  
隱于九華長慶中殿中待御史李行修舉冠卿孝節徵  
拜右拾遺不起制曰前進士費冠卿嘗與計偕以文中  
第歸不及於榮養恨每積於永懷遂乃屏迹丘園絕蹤  
仕進守其至性十有五年峻節無雙清飈自遠夫旌孝

行舉逸人所以厚風俗而敦名教也宜承高獎以警薄  
夫擢參近侍之榮載佇移忠之效可右拾遺

施肩吾元和十年及第以洪州之西山乃十二真君羽  
化之地靈蹟具存慕其真風高蹈於此常賦閑居遣興  
詩一百韻大行於世

皇甫穎早以清操著稱軋符中及第時四郊多壘穎以  
垂堂之誠絕意祿位隱於鹿門別墅尋以疾終

入道

戴叔倫貞元中罷容管都督上表請度為道士

蕭俛自左僕射表請度為道士

蔣曙中和初自起居即以弟兄因亂離遂屏跡丘園因  
應天令節奏請入道從之

顧况全家隱居茅山竟莫知所止其子非熊及第歸慶  
既莫知况寧否亦隱於舊山或聞有所遇長生之秘術  
也

論曰士之謀身得之者以才失之者惟命達失二揆弘

道要樞可謂勤於修己者與苟昧於斯繫彼能否臨深履薄歧路紛如得之則恃己所長失之則尤人不盡干祿之子能不慎諸乃知命也者足以引之而排舐望不足倚之而圖富貴倚之則事急急則智性昏引之則感通通則尤怨弭故丘軻之言命蓋阨窮而已矣有若立身慎行與聖哲同轍者則得喪語默復何薑芥乎復何穹隆乎然士有死而不忘者恩與知而已矣包子之誤放李翱之奏章足以資笑談不足以彰事實有功成身

退冥心希夷者吾不得而齒矣

唐撫言卷八

唐撫言卷九

唐 王定保 撰

防慎不至

張峴妻顏蕘舍人猶女峴有樊表兄者來自江之南告  
峴請叩蕘求宰宇峴許之而蕘久不應樊謂誑已中心  
銜之頗切一旦謂峴曰弟卷軸不鄙惡札可以佐弟峴  
欣然以十餘軸授之皆要切卷子延引逼試每軸頭為



札三兩紙而授之峴鬱悒而已

房珣河南人太尉之孫咸通四年垂成而敗先是名第  
定矣無何寫錄之際仰泥落擊翻硯瓦汙試紙珣以中  
表重地祇薦珣一人主事不獲已須應之珣既臨曙更  
請叩副試主司不諾遂罷

李廷璧乾符中試夜於鋪內偶獲襖子半臂一對廷璧  
起取衣之同鋪賞之曰此得非神授逡巡有一人擒捉  
大呼云捉得偷衣賊也

誤掇惡名

華京建州人也極有賦名向遊大梁嘗預公宴因與監軍使面熟及至京師時已登科與同年連鑣而行逢其人於通衢馬上相揖因之謗議喧然後頗至沉棄終太學博士

劉纂者高州劉舍人蛻之子也嗣為文亦不惡乾寧中寒栖京師偶與一醫工為隣纂待之甚至徃徃假貸於其人其人即上樞吳開府門徒嗣薛王為大京兆醫工

為知柔診脉從容之際言纂之窮且屈知柔甚領覽會  
試官以解送等第稟於知柔知柔謂纂是開府人來囑  
斯必開府之意也非解元不可由是以纂居首送纂亦  
不知其由自是纂落數舉方悟萬計莫能雪之

裴筠婚蕭楚公女言定未幾便擢進士羅隱以一絕刺  
之略曰細看月輪還有意信知青桂近嫦娥

楊篆員外乾符中佐永寧劉丞相淮南幕因遊江失足  
墜水待遣人歸宅取衣久而不至公聞之命以衣授篆

少頃衣至甚華靡問之乃護戎所賜

時中貴李全華監揚州

公聞

之無言後除起居舍人為同列譖改授駕部員外郎由  
是一生坎軻

好知己惡及第

邵安石建州人也高湘侍郎南遷歸闕途次連江安石  
以所業投獻遇知遂挈至輦下湘主文安石擢第詩人  
章碣賦東都望幸詩刺之曰懶修珠翠上高臺眉月連  
娟恨不開縱使東巡也無益君王自領美人來

鄭隱者其先閩人徙居循陽因而耕焉少為律賦詞格  
固尋常咸康末小魏公沆自闕下黜循州佐于時循人  
稀可與言者隱贊謁之沆一見甚慰意自是日與之遊  
隱年少懶於事因傲循官寮由是犯衆怒故責其逋租  
繫之非所沆聞大怒以錢代隱輸官復延之上席未幾  
沆以普恩還京命隱偕行隱稟性超超沆之門吏家僕  
靡不惡之往往呼為乞索見沆待之如一行次江陵隱  
狎遊多不館宿左右爭告沆召隱徵辯隱以實對沆乃

資以財帛左右尤不測也行至商顏詔沆知貢舉時在京骨肉間沆携隱皆以書止之沆不能捨遂令就策試然與諸親約止於此耳暨榜除之夕沆巡廊自呼隱者三四矍然頓氣而言曰鄭隱崔沆不與了却更有何人肯與之一舉及第然隱遠人素無閑外名足不跡先達之門既及第而益孤上過閑譙策蹇出京槃桓淮浙間中和末鄭續鎮南海辟為從事諸同舍皆以無素知間隱自謂有科第志無復答既赴辟同舍皆不睦續不得

已致隱於外邑居歲餘又不為宰君所禮會續欲貢士以幕內無名人迺隱尸之其宰君謂隱恨且久仇之必矣遂於餞送筵置鴆隱大醉吐血而卒

崔元翰為楊崖州炎所知欲奏補闕懇曰願進士由此獨步場中然不曉呈試先求題目為地崔教知之旭日都堂始開盛氣白侍郎曰白雲起封中賦教請退主司於簾中卒愕換之是歲二崔俱捷

好及第惡登科

許孟容進士及第學究登科時號錦袄子上著莎衣蔡  
京與孟容同

論曰古人舉事之所難者大則赴湯火次則臨深履薄  
李少卿又曰搯空脊冒白刃間者靡不膽寒髮豎永為  
子孫之戒噫危矣彼之得因我也失亦因我也殊不知  
三百年来科甲之設草澤望之起家簪紱望之繼世孤  
寒失之其族餒矣世祿失之其族絕矣愧彼為裘之義  
覩乎析薪之喻方之湯火深薄空脊白刃危在彼矣是



知瓜李之嫌惹致之謗斯不可忘若邵鄭二子單進求名之志先其類雖順坂之勢可惜而握苗之戒難忘名既靡揚得之不求崔公脅制仁者所不為也許蔡二人所取者道也非為名也莎錦之譬謔浪而已

勅賜及第

韋保乂咸通中以兄在相位應舉不得特勅賜及第擢入內庭

永寧劉相鄴字漢藩咸通中自長春宮判官召入內庭

特勅賜及第中外賀緘極衆唯鄆州李尚書種一章最著乃福建韋尚書岫之詞也于是韋佐鄆幕略曰用勅代榜由官入名仰溫樹之煙何人折桂沂甘泉之水獨我登龍禁門而便是龍門聖主而永為座主又曰三十浮名每年皆有九重知己曠代所無相國深所慊鬱盖指斥太中的也

杜昇父宣猷終宛陵昇有詞藻廣明歲蘇導給事刺劍州昇為軍倖駕幸西蜀例得召見特勅賜緋導入內韋

中令自翰長拜主文昇時已拜小諫抗表乞就試從之  
登第數日有勅復前官并服色議者榮之

秦韜玉出入大闔田令孜之門車駕幸蜀韜玉已拜丞  
郎判鹺及小歸公主文韜玉准勅放及第仍編入其年  
榜中韜玉置書謝新人呼同年略曰三條燭下雖阻文  
闈數仞牆邊幸同恩地

王彥昌太原人家世簪冕推于鼎甲廣明歲駕幸西蜀  
恩賜及第後為嗣薛王知柔判官昭宗幸石門時宰臣

與學士不及隨駕知柔以京尹判鹺權中書事屬近輔  
表章繼至切於批答知柔以彥昌名間遂命權知學士  
居半載出拜京尹又左常侍大理寺卿為本寺人吏所  
累南遷

表薦及第

乾寧中駕幸三峯殷文圭者携梁王表薦及第仍列於  
榜內時楊令公行密鎮維揚奄有宣浙揚汴榛梗久矣文  
圭家池州之青陽辭親間道至行在無何隨榜為吏部

侍郎裴樞宣諭判官至大梁以身事叩梁王王乃上表  
薦之文圭復擬歸非遍投啟事於公卿間略曰於菟獵  
食非求尺璧之珍鷄鶩避風不望洪鐘之樂既擢第由  
宋汴馳過俄為多言者所發梁王大怒亟遣追捕已不  
及矣然自是屢言措大率皆負心常以文圭為證白馬  
之誅靡不由此也

何澤韶陽曲江人也父鼎容管經略有文稱澤乾寧中  
隨計至三峯行在永樂崔公即澤之同年丈人也間澤

來舉乃以一絕振之曰四十九年前及第同年唯有老夫存今日殷勤訪我子穩將髻鬣上龍門時主文與奪未分又會相庭有所阻時崔相公微特權即永樂猶子也因之敗於垂成後漂泊關外梁太祖受禪澤假廣南幕職入貢勅賜及第

惡得及第

于杭舊名韜玉長興相國兄子貴主視之如己子莫不委之家政往往與於關節由是衆議喧然廣明初崔厚

侍郎榜貴主力取鼎甲榜除之夕為設庭燎仍為宴具  
以候同年展敬選內人美少者十餘輩執燭跨乘列於  
長興西門既而將入辨色有朱衣吏馳報曰胡子郎君  
未及第胡子小字枕諸炬應聲擲之于地巢寇難後於川中  
及第依棲田令孜矣或曰枕及第非令孜力後依其門  
耳

高鎔侍郎第一榜裴思謙以仇中尉關節取狀頭鎔庭  
讎之思謙迴顧厲聲曰明年打脊取狀頭明年鎔戒門

下不得受書題思謙自懷士良一緘入貢院既而易以紫衣趨至階下白鍔曰軍容有狀薦裴思謙秀才鍔不得已遂接之書中與思謙求巍峩鍔曰狀元已有人此外可副軍容意旨思謙曰卑吏面奉軍容處分裴秀才非狀元請侍郎不放鍔俛首良久曰然則略要見裴學士思謙曰卑吏便是思謙詞貌堂堂鍔見之改容不得已遂禮之矣

黃郁三衢人蚤遊田令孜門擢進士第歷正郎金紫李



端曲江人亦受知於令孜擢進士第又為令孜賓佐俱為孔魯公所嫌文德中與郁俱陷刑網

芳林十哲

今記得者八人

沈雲翔亞之弟也

林繕改名絢閩人光化中守太常博士

鄭玘

劉業

唐珣

吳商叟

以上四人未知其詳

秦韜玉京兆人父為左軍軍將韜玉有詞藻亦工長短句有貴公子行曰堦前莎毯綠不卷銀龜噴香挽不斷

亂花織錦柳撚線粧點池臺畫屏展主人功業傳國初  
六親聯絡馳朝車鬪鷄走狗家世事抱來皆佩黃金魚  
却笑書生把書卷學得顏回忍饑面然慕柏耆為人至  
於躁進駕幸西蜀為田令孜擢用未期歲官至丞郎判  
鹽鐵特賜及第

郭薰者不知何許人與丞相于都尉向為硯席之交及  
綜居重地復綰財賦薰不能避譏嫌而樂為半夜客咸  
通十三年趙隲主文斷意為薰致高等隲甚撓沮而拒

之無名會列聖忌辰宰執已下於慈恩寺行香忽有綵  
帖子千餘各方寸許隨風散漫有若蜂蝶其上題云新  
及第進士郭薰公卿覽之相顧赧然因之主司得以黜  
去

咸通中自雲翔輩十人今所記者有八皆交通中貴  
號芳林十哲芳林門名由此入內故也然皆有文字蓋  
禮所謂君子達其大者遠者小人知其近者小者得之  
與失乃不能糾別淑慝有之矣語其虵豕之心者豈其

然乎

四凶 今所記者三

陳磻叟者父名岵富有詞學尤溺於內典長慶中嘗註  
維摩經進上有中旨令與好官執政謂岵因內道場僧  
進經頗抑挫之止授少列而已磻叟形質短小長喙踈  
齒尤富文學自負王佐之才大言騁辯雖接對相公旁  
若無人復自料非名教之器弱冠度為道士隸名於昊  
天觀咸通中降聖之辰二教論義而黃衣屢奔上小不

憚宣下令後輩新入內道場有能折衝浮圖者許以自薦磻叟攝衣奉詔時釋門為主論自誤引涅槃經疏磻叟應聲叱之曰皇帝三呼大慶阿師口稱獻壽而經引涅槃犯大不敬初其僧謂磻叟不通佛書既而錯愕殆至顛墜自是連挫數輩聖顏大悅左右呼萬歲其日簾前賜紫衣一襲磻叟由是恣其輕侮高流宿德多患之潛聞上聽云磻叟衣冠子弟不願在冠帔頗思理一邑以自効耳於是中旨授至德縣令磻叟莅事未終考秩

拋官詣闕上封事通義劉公引為羽翼非時召對數刻  
礪叟所陳凡數十節備究時病復曰臣請破邊城家可  
以贍軍一二年上問邊城何人對曰宰相路巖親吏既  
而大為巖恚翌日勅以礪叟誣罔上聽訐斥大臣除  
名為民流愛州礪叟雖至顛蹶輒不敢以其道自屈素  
有重墜之疾歷聘藩后率以肩輿造堦廡所至無不仰  
止及巖貶礪叟得量移為鄧州司馬時屬廣明庾子之  
後劉巨容起徐將得襄陽不能礪叟待以巡屬一州佐

耳礮叟汧漢南下中途與巨容幕吏書云已出無禮之鄉漸及逍遙之境巨容得之大怒遣步健十餘輩移牒潭鄂追捕礮叟時天下喪亂無人為隄防既而為卒伍所凌全家汧漢至賈漣後門三十餘口無噍類矣

劉子振蒲人也頗富學業而不知大體尤好凌轢同道詆訐公卿不恥干索州縣稍不如意立致寒暑以至就試明庭稠人廣衆罕有與之談者居守劉公主文歲患舉子納卷繁多榜云納卷不得過三軸子振納四十軸

因之大掇函譽子振非不自知蓋不能抑壓耳乾符中  
官為博士三年釋奠禮畢令學官講書宰臣已下皆與  
聽焉時子振講禮記陸鸞講周易

李沼者封川相猶子也其妻乃董常侍禹之女也大順  
中邠州節度使尚父王行瑜外族董氏以舅事於禹沼  
樂遊行瑜之門行瑜呼沼李郎會與計偕僕馬生生之  
具皆行瑜所致沼負是大恣未幾按甲來覲諷天子誅  
大臣縉紳間重足一跡沼出入行瑜之門頗有得色及



行瑜敗詔捕沼沼亡命秦隴

論曰才者璞也識者工也良璞授於賤工器之陋也偉才任於鄙識行之缺也由是立身揚名進德修業苟昧乎識未有一其行藏者也矧乃時之不来命或多蹇善惡蔽於反已得失倖於尤人豈不驟達終危雖榮是辱非夫克明蹇靜之本洞究存亡之域臨財無苟得臨難無苟免而能索身於坦夷者未之有也揚子雲曰治亦鳳也美才高識其唯君子歟



唐撫言卷九

唐撫言卷十

唐 王定保 撰

載應不捷聲價益振

太和二年裴休等二十三人登制科時劉蕡對策萬餘字深究治亂之本又多引春秋大義雖公孫弘董仲舒不能肩也自休以下靡不歛衽然亦指斥貴幸不顧忌諱有司知而不取時登科人李邵詣闕進疏請以已之

所得易黃之所失疏奏留中黃期月之間屈聲播於天下

乾符中蔣凝應宏詞為賦止及四韻遂曳白而去試官不之信逼請所試凝以實告既而比之諸公凝有得色試官歎息久之頃刻之間播於人口或稱之曰白頭花鈿滿面不若徐妃半粧

貞元中樂天應宏詞試漢高祖斬白蛇賦考落蓋賦有知我者謂我斬白帝不知我者謂我斬白蛇也然登科

之人賦並無間白公之賦傳於天下也

論曰無義而生不若有義而死邪曲而得不若正直而失雖抱屈於一時竟垂裕於千載者黃得之矣比夫天地無全功聖人無全能者白得之矣麟肝鳳髓不登於俎者其惟蔣君乎

海叙不遇

宋濟老於詞場舉止可笑嘗試賦誤落官韻撫膺曰宋五坦率矣由此大著後禮部上甲乙名明皇先問曰宋

五坦率否或有客譏宋濟曰白袍何紛紛答曰為朱袍紫袍紛紛耳

張倬者東之孫也嘗舉進士落第捧登科記頂戴之曰此即千佛名經也

平曾謁華州李相固言不遇因吟一絕而去曰老夫三日門前立珠箔銀屏晝不開詩卷却拋書袋裏譬如閒看華山來

劉魯風江西投謁所知頗為典謁所阻因賦一絕曰萬

卷書生劉魯風煙波千里謁文翁無錢乞與韓知客名  
紙毛生不為通

羅隱光化中猶佐西浙幕同院沈嵩得新榜封示隱隱  
批一絕於紙尾曰黃土原邊狡兔肥矢如流電馬如飛  
灞陵老將無功業猶憶當時夜獵歸

莊布謁皮日休不遇因以長書疏之大行於世

溫憲先輩庭筠之子光啟中及第尋為山南從事詞人  
李巨川草薦表盛述憲先人之屈畧曰蛾眉先妒明妃



為去國之人猿臂自傷李廣乃不侯之將

盧汪門族甲於天下因官家於荆南之塔橋舉進士二十餘上不第滿朝稱屈嘗賦一絕頗為前輩所推曰惆悵興亡繫綺羅世人猶自選青娥越王解破夫差國一個西施已太多晚年失意因賦酒胡子長歌一篇甚著序曰二三子逆旅相遇貰酒於旁舍且無絲竹以用娛賓友蘭陵掾淮南王探囊中得酒胡子置於座上拱而立令曰巡觴之胡人心俛仰旋轉所向者舉盃胡貌類

人亦有意趣然而傾側不定緩急由人不在酒胡也作  
酒胡歌以誚之曰同心相遇思同歡擎出酒胡當玉盤  
盤中餽飢不自定四座親賓注意看可以不在心否以  
不在面徇俗隨時自圓轉酒胡五藏屬他人十分亦是  
無情勸爾不耕亦不饑爾不蚕亦有衣有眼不魯分黼  
黻有口不能明是非鼻何尖眼何碧儀容本非天地力  
雕鐫匠意若多端翠帽朱衫巧裝飾長安斗酒十千酤  
劉伶平生為酒徒劉伶虛向酒中死不得酒池中拍浮

酒胡一滴不入腸空令酒胡名酒胡

羅隱梁開平中累徵夕郎不起羅衮以小天倖大秋姚  
公使兩浙衮以詩贈隱曰平日時風好涕流諛書雖盛  
一名休衮區歎屈瞻天問夷貊間詩過海求向夕便思  
青瑣拜近年尋伴赤松遊何當世祖從人望蚤以公台  
命卓侯隱答曰崑崙水色九般流飲即神仙憩即休敢  
恨守株曾失意始知緣木更難求鵠原謾欲均餘力鶴  
髮那堪問舊遊遙望北辰當上國羨君歸棹五諸侯

孫定字志元涪州大戎之族子長於儲定數舉矣而儲  
方欲就貢或訪於定定謔曰十三郎儀表堂堂好箇軍  
將何須以科第為資儲頗銜之後儲貴達未嘗言定之  
長晚年喪志放意杯酒景福二年下第遊京西出關遠  
門醉中走筆寄儲詩曰行行血淚洒塵襟事逐東流渭  
水深愁跨蹇驢風尚緊靜投孤店日初沈一枝猶掛東  
堂夢千里空馳北巷心明日悲歌又前去滿城煙樹噪  
春禽定詩歌千餘首多委於兵火竟無成而卒

歐陽澣者四門之孫也薄有詞賦出入場中僅二十年  
善和韋中令在閣下澣即行卷及門凡十餘載未嘗一  
面而澣慶弔不虧韋公雖不言而心念其人中和初公  
隨駕至西川命相時澣寓居漢南公訪知行止以私書  
令襄帥劉巨容俾澣計偕巨容得書大喜待以厚禮首  
薦之外資以千餘緡復大譙於府幕既而撰日遵路無  
何一夕心痛而卒巨容因籍澣答書既呈於公公覽之  
憮然因曰十年不見灼然不錯

劉得仁貴主之子自開成至大中三朝昆弟皆歷貴仕  
而得仁苦於詩出入舉場三十年竟無所成嘗自述曰  
外家雖是帝當路且無親既終詩人爭為詩以弔之唯  
供奉僧栖白擅名詩曰忍苦為詩身到此冰魂雪魄已  
難招直教桂子落墳上生得一枝冤始銷

李洞唐諸王孫也嘗遊兩川慕賈閬仙為詩鑄銅像其  
儀事之如神洞為終南山詩二十韻句有殘陽高照蜀  
敗葉遠浮涇復曰劖竹烟嵐凍偷秋雨電腥遠平丹

鳳闕冷射五侯廳又贈司空侍郎云馬饑食落葉鶴病  
曬殘陽又曰卷箔清溪月敲松紫閣書又送僧云越講  
迎騎象蕃齋懺射鵬復贈高僕射曰征南破虜漢功臣  
提劍歸來萬里身閑倚凌雲金柱看形容消瘦老於真  
復曰藥杵聲中擣殘夢茶鐺影裏煮孤燈復送人歸日  
東云島嶼分諸國星河共一天時人但謂其癖澁而不  
能貴其奇峭唯吳子華深知之子華才力浩大八面受  
敵以八韻著稱遊及頗攻騷雅常以百篇示洞洞曰大

凡所示百篇中有一聯絕唱西昌新亭曰暖漾魚遺子  
晴遊鹿引麝子華不怨所鄙而喜其所許洞三牓裴公  
第二牓策夜簾獻曰公道此時如不得昭陵慟哭一生  
休尋卒蜀中裴公無子人謂屈洞之致也

趙牧不知何許人大中咸通中數李長吉為短歌可謂  
戲金結繡而無痕跡對酒詩曰雲翁耕扶桑種黍養日  
烏手授六十甲子循環落落如弄珠長繩繫日未是愚  
有翁臨鏡捋白鬚飢魂弔骨吟古詩馮唐八十無高車



人生如夢在須臾何乃自苦八尺軀裂衣換酒且為娛  
勸君日飲一瓢夜飲一壺杞天崩雷騰騰紂非舜是何  
足憑桐君桂父豈欺我醉裡走龍多上升菖蒲花開魚  
尾定金丹始可延君命其餘尤工輕巧詞多不載

崔櫓慕杜紫微為詩而櫓才情麗而近蕩有無機集三  
百篇尤能詠如梅花詩曰強半瘦因前夜雪數枝愁向  
晚來天後曰初開已入雕梁畫未落先愁玉笛吹山鵲  
詩曰雲生柱礎降龍地露洗林巒放鶴天如此數篇可

謂麗矣若蓮花詩曰無人解把無塵袖盛取殘香盡日  
憐此頗形迹復能為應用四六之文詞亦深侔章句  
劉光遠不知何許人慕李長吉為長短歌尤能埋沒意  
緒竟不知其所終

姚巖傑梁國公元崇之裔孫童叟聰悟絕倫弱冠博通  
墳典慕班固司馬遷為文時稱大儒嘗以詩酒遨遊江  
左尤肆凌忽前達旁若無人乾符中顏標典鄱陽鞠場  
宇初構巖傑紀其事文成粲然千餘言標欲刊去一二

字巖傑大怒既而標以睚眦已勒石遂命覆碑於地以牛拽之磨去巖傑以一篇紀之曰為報顏公識我磨我心唯只與天和眼前俗物關情少醉後青山入意多田子莫嫌彈鋏恨甯生休唱飯牛歌聖朝若為蒼生計也合公車到薜蘿盧子發牧歙州巖傑在婺源先以著述寄肇知其人性使酒以手書哀美贈之以束帛辭以兵火之後郡中凋弊無以迎逢大賢巖傑復以長牋激之始以文友相遇千載一時肇不得已輟所乘馬迎至郡

齋館穀如公卿禮既而日肆傲睨輕視子發子發嘗以  
篇詠詫於巖傑曰明月照巴山巖傑笑曰明月照天下  
奈何獨照巴山耶子發慚不得意無何會於江亭時蒯  
希逸在席子發改令曰目前取一聯象令主曰遠望漁  
舟不濶尺八巖傑遽飲酒一器凭欄嘔噦須臾即席還  
肇令曰凭欄一吐已覺空喉有集二十卷目曰象溪子  
中和末豫章大亂巖傑苦河魚之疾寓於逆旅竟不知  
其所終

周賀少從浮圖法名清塞遇姚合而反初詩格清雅與  
賈長江無可上人齊名島哭柏巖禪師詩籍甚及賀賦  
一篇與島不相上下島曰苔覆石牀新師曾占幾春寫  
留行道影焚却坐禪身塔院闌松雪房廊露隙塵自嫌  
雙淚下不是解空人賀曰林逋西風急松枝講法餘凍  
鬚亡夜剃遺偈病時書地燥焚身後堂空著影初此時  
頻下淚曾省到吾廬

繆島雲少從浮圖才力浩大有李杜之風其詩尤重奇

險至如四五片霞生絕壁兩三行雁過疎松復曰拋芥  
子降顛狒狒折楊枝灑醉猩猩廬山瀑布曰白鳥遠行  
野玉虹孤飲潭皆曼出前輩開成中嘗遊豫章武宗朝  
准勅反初名甚喧然

胡玠不知何許人嘗隱廬山苦心於五七言桑落洲一  
篇曰莫問桑田事但看桑落洲數家新住處昔日大江  
流古岸崩欲盡平沙長未休想應百年後人世更悠悠  
又月詩云輪中別有物後改云桂根寧有土光外更無空玠與李

隲舊交隲廉問江西旂不至

段維或云忠烈之後年及強仕殊不知書一旦自悟其  
非間中條山書生淵藪因往請益衆以年長猶未發蒙  
不與受經或曰以律詩百餘篇俾其諷誦翌日維悉能  
強記諸生異之復受八韻一軸維誦之如初因授之孝  
經自是未半載維博覽經籍下筆成文於是請下山求  
書糧至蒲陝間遇一前資郡牧即世請維誌其墓維立  
成數百言有燕許風骨厚獲濡潤而乃性嗜煎餅嘗為

文會每箇煎餅纔熟而維一韻賦成咸通乾符中聲名籍甚竟無所成而卒

劇燕蒲坂人也工為雅正詩王重榮鎮河中燕投贈王曰祇向國門安四海不離鄉井拜三公重榮甚禮重為人多縱凌轢諸從事竟為正平之禍

李濤長沙人也篇詠甚著如水聲長在耳山色不離門又掃地樹留影拂床琴有聲又落日長安道秋槐滿地花皆膾炙人口溫飛卿任太學博士主秋試濤與衛丹



張邵等詩賦皆勝於都堂

任濤豫章筠川人也詩名蚤著有露團沙鶴起人卧釣  
舡流他皆仿此數舉敗於垂成李常侍鴈廉察江西時  
與放鄉里之役盲俗互有論列鴈判曰西江境內凡為  
詩得及濤者即與放邑役不止一任濤耳

羅虬詞藻富贍與宗人隱鄴齊名咸通乾符中時號三  
羅廣明庚子亂後去從鄜州李孝恭籍中有紅兒者善  
肉聲嘗為貳車屬意會貳車聘隣道虬請紅兒歌而贈

之繒綵孝恭以副車所貯不令受所貶虬怒拂衣而起  
詰旦手書絕句百篇號比紅詩大行於時

周緘者湖南人也咸通初以詞賦擅名緘嘗為角觝賦  
略曰前衝後敵無非有力之人左攫右拏盡是用拳之  
手或云緘善角觝

周繫池州青陽人也兄繇以詩篇中第繫工八韻有飛  
卿之風

何涓湘南人也業詞嘗為瀟湘賦天下傳寫少遊國學

同時潘緯者以古鏡詩著名或曰潘緯十年吟古鏡何  
涓一夜賦瀟湘

章碣不知何許人或曰孝標之子咸通末以篇什著名  
乾符中高侍郎湘自長沙携邵安石至京及第碣賦東  
都望幸以刺之

詩在好知己  
惡及第門

復為焚書坑詩曰竹帛煙

銷帝業虛昔年曾是祖龍居坑灰未冷關東亂劉項從  
來不讀書

來鵠豫章人也師韓柳為文大中末咸通中聲價益藉

甚廣明庚子之亂鵠避地遊荆湘南返中和客死於維揚

閔廷言豫章人也文格高絕咸通中初與來鵠齊名王  
棨嘗謂同志曰閔生之文酷似西漢有魚腹誌一篇棨  
尤所推服

張喬池州九華人也詩句清雅曷無與倫咸通末京兆  
府解李建州時為京兆參軍主試同時有許棠及喬與  
俞坦之劇燕任濤吳罕張蠩周繇鄭谷李栖遠溫憲李

昌符謂之十哲其年府試月中桂詩喬擅場詩曰與月  
長洪濛扶疎萬古同根非生下土葉不墜秋風每以圓  
時足還隨缺處空影超羣木上香滿一輪中未種青霄  
日應虛白兔宮何當因羽化細得問神功其年頻以許  
棠在場席多年以為首薦喬與俞坦之復受許下薛能  
尚書深知因以詩唁二子曰何事盡參差惜哉吾子詩  
日令銷此道天亦負明時有路當重振無門即不知何  
曾見堯日相與啜澆漓

謝廷浩閩人也大順中頗以詞賦著名與徐夔不相上下時號錦繡堆

李巨川字下已姑臧人也士族之鼎甲工為燕許體文廣明庚子亂後失身於人佐興元楊守亮幕守亮大闔復恭養子守亮敗為華帥韓建所擒建重其才奏令掌書奏凡十餘年名振海內乾寧中駕幸三峯巨川自使下侍御史拜工部郎中稍遷考功郎中諫議大夫時建奏勒諸王放散殿後都雪岐下宋文通皆巨川之謀也

上返正轉假禮部尚書充黃州節度判官上至華清宮  
遣使賜建御容一軸時巨川草謝表以示吳子華其中  
有彤雲似蓋以長隨紫氣臨關而不度子華吟咏不已  
因草篇與巨川對壘略曰霧開萬里克諧披覩之心掌  
拔一峯兼助捧持之力天祐初大駕幸岐梁太祖自東  
平擁師迎駕至三峯單騎出降既而素忌巨川多謀遣  
人害之

陳象袁州新喻人也少為縣吏一旦憤激為文有西漢

風骨者貫子十篇南平王鍾傳鎮豫章以羔雁聘之累  
遷行軍司馬御史大夫傳薨象復佐其子文政為淮師  
攻陷象被擒送維揚戮之象頗師黃老訖至於此莫知  
所自也

湯簣潤州丹陽人也工為應用數舉敗於垂成李巢在  
湖南鄭續鎮廣南俱以書奏受惠晚佐江西鍾傳書檄  
闐委未嘗有倦色傳女適江夏杜洪之子時及昏瞑有  
人走乞障車文簣命小吏四人各執紙筆倚馬待製既



而四本俱成天祐中逃難至臨川憂患而卒

陳岳吉州廬陵人也少以詞賦貢於春官氏凡十上竟  
抱至寃晚年從豫章鍾傳復為同舍所譖退居南郭以  
墳典自娛因以博覽羣籍常著書商較前史得失尤長  
於班史之業評三傳是非著春秋折衷論三十卷約大  
唐實錄撰聖紀一百二十卷以所為述作號陳子正言  
十五卷其詞賦歌詩別有編帙光化中執政議以蒲帛  
徵傳聞之復辟為從事後以讒黜尋遘病而卒

李凝古給事中損之子冲幼聰敏絕倫工為燕許體文  
中和中從彭門時溥溥令製露布進黃巢首級凝古詞  
學精敏義理該通凡數千言冠絕一時天下仰風無何  
溥奏諸將各領一麾凝古獲濡潤而不之謝溥因茲減  
溥

韋莊奏請追贈不及第人近代者

孟郊字東野工古風詩名播天下與李觀韓退之為友  
貞元十二年及第佐徐州張建封幕卒使下廷評韓文

公作誌東野謚曰貞耀先生賈島詩曰身歿聲名在多  
應萬古傳寡妻無子息破宅帶林泉塚近登山道詩隨  
過海船故人相弔處斜月下寒天

莊云不及  
第誤也

李賀字長吉唐諸王孫也父璿肅邊上從事賀年七歲  
以長短之製名動京華時韓文公與皇甫湜覽賀所業  
奇之而未知其人因相謂曰若是古人吾曹不知者若  
是今人豈有不知之理會有以璿肅行止言者二公因  
連騎造門請見其子既而總角荷衣而出二公不之信

因面試一篇承命欣然搢觚染翰旁若無人仍目曰高

軒過曰華裾織翠青如葱金鑲壓轡搖玲瓏馬蹄隱耳  
聲隆隆入門下馬氣如虹云是東京才子文章鉅公二  
十八宿羅心胸殿前作賦聲磨空筆補造化天無功元  
精炯炯貫當中龐眉書客感秋蓬誰知死草生華風我  
今垂翅負冥鴻他日不羞蛇與龍二公大驚以所乘馬  
命聯鑣而還所居親為束髮年未弱冠丁內艱他日舉  
進士或謗賀不避家諱文公特著辨諱一篇不幸未登

壯室而卒

皇甫松著醉鄉日月三卷自叙之矣或曰松丞相奇章公表甥然公不薦因襄陽大水遂為大水辭極言誹謗有夜入珍珠室朝遊瑤瑁宮之句公有愛姬名真珠

李羣玉不知何許人詩篇妍麗才力適健咸通中丞相修行楊公為奧主進詩三百篇授麟臺讐校

陸龜蒙字魯望三吳人也幼而聰悟文學之外尤善談笑常體江謝賦事名振江左居於姑蘇藏書萬餘卷詩

篇清麗與皮日休為唱和之友有集十卷號曰松陵集  
中和初遘疾而終顏蕘給事為文誌其墓吳子華奠文  
千餘言略曰大風吹海海波淪漣涵為子文無隅無邊  
長松倚雪枯枝半折挺為子文直上巔絕風下霜晴寒  
鐘自聲發為子文鏗鏘杳清武陵深閨川長晝白間為  
子文渺茫岑寂豕突禽狂其來莫當雲沈鳥沒去其條  
忽臙若凝脂軟於無骨靈漠漠澹涓涓春融冶秋鮮妍  
觸即碎潭下月拭不滅玉上烟

趙光遠丞相隱弟子幼而聰悟咸通乾符中以為氣焰  
溫李因之恃才不拘小節常將領子弟恣遊狹斜著北  
里志頗述其事

李甘字龢鼎長慶四年及第登科記已注矣

莊云不第誤矣

溫庭皓庭筠之弟詞藻亞於兄不第而卒

劉得仁

陸逵

傅錫

平曾

賈島

劉稚珪

顧邵孫

吳人沈珮

吳人

顧蒙宛陵人博覽經史慕燕許刀尺亦一時之傑餘力

深究內典繇是屢為浮圖碑倣歐陽率更筆法酷似前人  
庚子亂後萍梗江浙間無何有美姬為潤帥周寶奄  
有蒙不能他去而受其豢養由此名價減薄甲辰淮浙  
荒亂避地至廣州人不能知困於旅食以至書千字文  
授於僇俗以換斗筲之資未幾遘疾而終蒙頗窮易象  
著大順圖三卷

羅鄴餘杭人也家富於財父則為鹽鐵小吏有子二人  
俱以文學干進鄴尤長七言詩時宗人隱亦以律韻著



稱然隱才雄而麗疎艱才清而綿緻咸通中崔安潛侍郎廉問江西志在弓旌竟為幕吏所沮既而俯就督郵因茲舉事闡珊無成而卒

方干桐廬人也幼有清才為徐凝所器誨之格律干或有句云把得新詩草裏論反語云村裏老謔凝而已王大夫

名與定保家諱下字同

廉問浙東干造之連跪三拜因號方

三拜王公將薦之於朝請吳子華為表草無何公邁疾而卒事不諧矣

前件人俱無顯遇皆有奇才麗句清詞徧在時人之  
口銜冤抱恨竟為冥路之塵但恐憤氣未銷上衝穹  
昊伏乞宣賜中書門下追贈進士及第各贈補闕拾  
遺見存明代唯羅隱一人亦乞特賜科名錄升三級  
便以特勅顯示優恩俾使已升冤人皆霑聖澤後來  
學者更厲文風

論曰工拙由人得喪者命非賢之咎伊時之病善不為  
名而名隨之名不為祿而祿從之是謂命自我立也小

人之儒也尤人君子之儒也反已詩曰風雨如晦鷄鳴  
不已

唐撫言卷十